

Tajuk : UNIMAS ngaga tekak mikro di Kampung Pa'Rampoh



NYADIKA PENGINGAT ... Datuk Gerawat Jala begambar nyadika pengingat begulai enggau mensia mayuh pengudah pengerami Ngelancharka Projek Tekat Mikro Kampung Pa'Rampoh A & B di Bario.



NINGAKA PENERANG ... Datuk Gerawat Jala ningaka penerang bekaul enggau projek tekak mikro pengudah pengerami Ngelancharka Projek Tekat Mikro Kampung Pa'Rampoh A & B di Bario.

UNIMAS ngaga tekak mikro di Kampung Pa'Rampoh

BARIO: Penulung Speaker Kunsil Nengeri ti mega Kaban Kunsil Nengeri Mulu, Datuk Gerawat Jala udah Ngelancharka Projek Tekat Mikro Kampung Pa'Rampoh A & B di Bario.

Sama bisi datai ngulu pengerami nya Sapit Penulung Chanselor Universiti Malaysia Sarawak (UNIMAS), Profesor Dato' Mohamad Kadim Suaidi.

Belanja dikena ngemujurka Projek Bekal Leterik Menua Pesisir (BELB) nya ditanggung Opis Menteri Kuasa Teknologi Ijau enggau Ai (KeTTHA) sereta

diatur Palan Kuasa Ulih Dikena Baru (CREN) ari Fakulti Kejuruteraan, UNIMAS.

Tabak projek nya enda jauh ari sungai lalu iya beguna amat, dikena ngemujurka perambu perintah ti deka ngemansangka pengelantang pengidup rayat menua pesisir datai ba taun 2020.

Kampung Pa'Rampoh enda jauh ari tanah tinggi Kelabit di timur tasik Sarawak, lalu ekonomi ke dikemeranka rayat ba endur nya pengawa betanam betupi baka nanam padi enggau

nanas.

Sebedau tu rayat ba endur nya semina bepanggai ba injin api ngena minyak diesel dikena ngasilka kuasa leterik dikena bejalaika pengawa ekonomi ninting hari laban kampung nya bedau bisi bekal leterik sebedau tu.

Sistem Kuasa Leterik Diesel bisi pengurang laban ngeluaraka asap sereta inggar amat ke tau ngachau pengelikan enggau pengelantang rayat ba endur nya kelimpah ari mansutka belanja ke chukup mayuh dike-

na meli minyak diesel.

Tuju ngatur projek nya laban deka bejalaika pengawa mansik bekaul enggau infrastruktur Hidro-Mikro ngambika ulih nyedia bekal leterik ngena kuasa tekak (ai) ngagai Kampung Pa'Rampoh.

Projek nyau tu udah tembu digaga kenau ari bulan September 2015 lalu diatu tekak nya udah nyediaka kuasa leterik enda bebayar.

Nitihka "UNIMAS Micro Hydro Community Based Framework" sereta sukung ari sida ke ngem-

pu menua CREN (UNIMAS) diberi tanggungpengawa ngemujurka Projek Tekat Mikro nya.

Tuju ngemujurka projek nya dikena nyediaka kuasa leterik enda bebayar ungkup rayat ba endur nya ngambika sida iya enda ibuh mansutka belanja dikena meli minyak.

Bekal leterik ari sistem tekak mikro nya ulih dikena ngidupka lampu, kipas angin, peti ais bekuasa baruh, televisyen, radio enggau perengka leterik ke bukai.

CREN mega komited deka

mantu sereta merambu seke-da sosio-ekonomi kelebih agi ba pengawa dagang ari asil kampung ke ulih ngangkatka tikas pengidup rayat ba endur nya.

CREN mega bejalaika pengawa mansik, nyediaka perambu sereta ngemansangka sosio ekonomi rayat ba menua pesisir ke bukai di sereta Sarawak enti projek nya mujur ila.

Mensia mayuh ti diau ba endur nya anang irau ati laban bekal leterik nya chukup dikena rayat ba endur nya ninting hari.

Ba maya ke diatu rayat ba

endur nya bisi dua bengkah chara ulih ngasilka kuasa leterik ke ulih diidupka baru sereta ulih nyungkakka sosio-ekonomi rayat ba endur nya baka bejalaika pengawa nupi ikan ngena chara komersial, ngasilka Berau Bario nyadi Tepung Beraju Bario sereta ngasilka ai tebu enggau nanas.

Dikena nyaga sistem tekak mikro nya siti komiti khas ba kampung nya udah ditumbulka dikena meresa sereta matau sistem tekak nya ngambika nadai penanggal.